

22 SEP 2000

Gerakan-kekuatan/I

GERAKAN DIPERKUAT UNTUK HADAPI SUASANA POLITIK BARU

KUALA LUMPUR, 22 Sept (Bernama) -- Gerakan akan diperkukuh untuk menghadapi suasana politik semasa dan akan datang yang kian mencabar, kata presidennya Datuk Seri Dr Lim Keng Yaik.

Beliau berkata aliran politik semasa memerlukan kepimpinan yang mampu bersama rakyat, berdedikasi dan berpengetahuan.

"Kita perlu memperkuatkan diri berasaskan ideologi politik yang terkandung dalam perlembagaan parti," katanya dalam temu bual dengan beberapa akhbar vernakular tempatan dan Bernama sebelum perhimpunan agung Gerakan yang akan bermula esok.

Beliau berkata perhimpunan itu akan memberikan tumpuan kepada perlunya anggota parti memahami perjuangan parti dan sanggup berkorban dan mendampingi rakyat tanpa mengira latar belakang mereka.

"Kembali kepada asas perjuangan parti mungkin boleh digambarkan dengan kata-kata 'Jangan tanya apa yang negara boleh buat untuk anda, tetapi apa yang anda boleh buat untuk negara,'" katanya.

Dr Lim berkata adalah penting, anggota parti menyertai parti bukan untuk kepentingan kewangan, untuk mendapatkan projek dan kedudukan, tetapi mereka perlu menganalisis diri terlebih dahulu apa yang telah mereka lakukan untuk parti.

"Pesanan itu juga ditujukan tidak hanya kepada anggota baru tetapi juga kepada semua anggota, termasuk anggota lama, yang mungkin beranggapan mereka mempunyai hak untuk meminta sesuatu daripada parti," katanya sambil menekankan perlunya parti mengetepikan anggota seumpama itu.

Dr Lim berkata parti juga akan terus menangani politik.

Beliau berharap pesanan ini akan diikuti oleh anggota parti, terutamanya pada perhimpunan dua hari itu, yang akan dirasmikan oleh Perdana Menteri Datuk Seri Dr Mahathir Mohamad yang juga Pengerusi Barisan Nasional, di Pulau Pinang esok.

-- BERNAMA

AT ZS RI